



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

1. Kalenderwoche – ab 3. Januar 2009

Gidarre, Gidarre!

So, Weihnachdn un Silvesdor hammor widdor lähbendisch iborschdandn! Jednfalls was misch un meine Sibbe bedreffn dud. Nee, mir hamm keenorlei Mänschnvorlusde infolsche von Völlorei un Sauforei zu vorzeischnen. Un ooch bei dor Beschärung is alles friedlich abgeloofn. Alle warn mid dähm, wasse gegrischd ham zufriedn. Jednfalls so rein äußerlich! Keenor had dähm annorn sei Geschenk mid härbe Worde vor de Fieße geschmeddord. Bei meinor Gudstn kann isch zum Beischbiel immor an dähr Ador an dor reschdn Schläfe erahnen, was los is. Wenn de Ador so zuggn dud, dann is Schdurm im Anzuch!

Nee, ooch bei meinor Gudstn hadde bei dor Beschärung nischd gezuggd. Friede, Freide, Eiorkuchn!

Abor mir hadn de Reschnung ohne unsorn Enkl gemachd. Unsor Enkl, also dor Enkl von mir un meinor Gudstn un von dähn annorn Schwieschorgroßeldorn - dähr is ja eischendlich dor absolute Sonnenschein bei alle Familjenzusammenkinfde - dor Middlbunkd! Basdian heeßdor! Un nu grade erschd reschd zu Weihnachdn. Alle wolld mor de Oochn von unsorn Basdi leischn sähn, wennor seine Geschänke ausbaggn dud.

Das heeßd, ausbaggn is ihm e bißl zu anschdrengegend gewähsn. Zweek Jahre issor jedzde. Das Ausbaggn mussdn mir als Omas un Obas erledischn. Dor Basdi had sich immor e Bagehd gegriffn un is dann zu eim von uns hingedaggeld un had dähn Befähl - "Auf!"- erdeild.

Das had soweit ganz brima geglabbd, abor de Geschänke konndn seine finsdore Miene nisch offhelln. Nisch eens von de Geschänke dad, wie erhoffd, das Kinnorooche vom Basdi zum leischn

bring. Basdi dad de ganze Zeid sähr schdräng guggn un zeischde keenorlei greeßore Gemiedsbewäschung. Absoluhd "guhl", wie dor Schwieschorsohn fesdgeschdelld had.

Un dann wolld mor unsorm Basdi zur Freide e baar Weihnachtsliedlor sing. "Oh, Danneboom" un solsche Sachn! Unsre Dochdor hadde gemeend, dass das dähm Basdi Schbaß machen däde. Sei Lieblingslied däde das Lied vom Niggolas sein. Se hadde also ihre Gidarre midgebrachd. Nodn un de Dexde von ee Dudznd Liedlor hadde se ausgedruggd un vorvielfälldischd, damid mir nisch bloß lalala singn missn. Dann hadse e kleenes Vorschbiel gemach - bling blang blong - un mir solldn nu einschdimm. Abor dor Basdi hadde was dageeschn. Dähr dad laud un nachdrigglisch seine eischne Gidarre fordorn. "Gidarre, Gidarre! Gidarre holen!" Ohne eische Gidarre wolde dähr eenfach nisch sing. Obwohl dähr ja off seinor Gidarre gahr nisch rischdisch schbieln kann - bloß so baar schräge Deehne... - abor dähr is schduhr gebliehm! Gidarre, Gidarre! Abor de Muddi hadde ehm bloß de eischne Gidarre midgebrachd. Die vom Basdi nisch.

Nachm driddn Lied hammor dann offgegähm, weil dor Basdi dazu iborgegang war, seine Forderung mid schrille Deehne Nachdrugg zu vorleihn. Gidarre, Gidarre! Dass unsor Basdi abor ooch dährardisch eischnsinnisch is... - na, das haddor villeischd von meinor Gudstn. Vom mir nisch!

Eduard Sachsenmeyer